

# La populaziun mundiala crescha

## En curt datti 7 milliardas carstgauns

■ (anr) **Ins quinta che la populaziun mundiala surpassia fin la fin da quest onn 7 milliardas carstgauns. Tranter quels sa chattan 1,8 milliardas giuvenils. Da quels vivan bunamain 90 pertschient en pajais da svilup.** En las terras bainstantas dal vest perencunter stagnescha la creschientscha da la populaziun. Per part va ella schizunt enavos. La populaziun mundiala crescha per 2,4 carstgauns pro secunda. 1999 era la marca da 6 milliardas carstgauns vegnida cuntanschida sin noss planet.

Fin 2050 vegn quintà cun ina populaziun mundiala da 9,1 mil-

liardas carstgauns. La populaziun vegn a crescer vinavant, sch'era betg uschè fitg sco il davos decenni. Tranter 1950 e 2000 era la populaziun s'augmentada treis giardas pli fitg (+142 pertschient) – u da 2,5 sin 6,2 milliardas.

L'Europa è il sulet continent nua che la populaziun sa reduce-scha. 1950 viveva mintga 5. abitant dal mund sin noss continent. 2010 era igl anc 10,6 pertschient (ca. 733 milliuns). L'onn 2050 quintan ins en l'Europa anc cun 7,6 pertschient u 691 milliuns abitants.

Il pli ferm augment da la populaziun mundiala vegn registrà

en l'Africa. Malgrà aids vegnia la populaziun a crescer là tenor prognosa per il dubel – davent da 1,03 milliardas sin 2 milliardas. La cumpart da la populaziun africana s'augmenta en quel decenni da 15 sin 21,5 pertschient, u dad 1,03 sin 2 milliardas. Igl è era da quintar che l'India vegnia ad esser suenter 2050 il pajais cun ils pli blers abitants (1,6 milliardas). Dapreschent èsi la China cun 1,3 milliardas (= 19,5 pertschient da la populaziun mundiala). En ils 15 pajais cun la pli gronda populaziun vivan 4,5 milliardas u dus terzs da l'entira populaziun mundiala.